

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U BANOVIĆIMA
Broj: 127 0 V 072841 24 V 3
Banovići, 13.06.2024. godine

Općinski sud u Banovićima, sudija Sead Konjević, u vanparničnom predmetu predlagača K.M., sin V. iz B., ..., C.S. sin V., iz B., ..., E.K. sin V., iz B., ..., Z.S., sin V. iz B., ... i L.E., kći V. iz B., ..., svi zastupani po punomoćniku Adnanu Malkiću advokatu iz Živinica, protiv protivnika predlagača RMU „Banovići“ d.d. Banovići, zastupan po A.M., uposleniku protivnika predlagača, radi određivanja pravične naknade za eksproprisane nekretnine, nakon što je održao ročište, dana 22.05.2024. godine, u prisustvu punomoćnika sudionika postupka, dana 13.06.2024. godine, donio je sljedeće:

R J E Š E N J E

Određuje se novčana naknada za eksproprisane nekretnine ranijih vanknjižnih suvlasnika K.M., C.S., E.K., Z.S. i L.E., u dijelu od po 1/5, u ukupnom iznosu od **135.961,06 KM i to:**

- naknada za zemljište označeno kao kč. br. 1341 zv. „Brdo“, njiva 6 klase u površini od 10281 m², upisana u zk. ul/kku broj 790, KO... u iznosu od 133.653,00 KM,
- naknada za voćna stabla u iznosu od 6.042,70 KM i
- naknada za šumska stabla u iznosu od 10.603,00 KM (što uključuje vrijednost postojeće drvene mase u iznosu od 8.645,20 KM, vrijednost izgubljenog prirasta 1.200,00 KM i vrijednost šumske kulture u iznosu od 758,30 KM),

sve sa pripadajućom zakonskom zateznom kamatom, od proteka 15 dana od dana dostavljanja ovog rješenja, pa do isplate, kao i da im naknadi troškove postupka u iznosu od 10.022,40 KM, u roku od 15 dana od dana prijema rješenja.

O b r a z l o ž e n j e

Dana 25.03.2019. godine, ovom sudu je dostavljen akt Službe za geodetske i imovinsko pravne poslove općine Banovići, broj: 04-31-1653/2018 od 20.03.2019. godine, kojim su, shodno članu 62. Zakona o eksproprijaciji („Službene novine FBiH“ broj 70/07), dostavili predmet K.M., C.S., E.K., Z.S. i L.E., ranije stvarnih vanknjižnih suvlasnika i suposjednika u dijelovima sa po 1/5, za utvrđivanje pravične naknade za eksproprisane nekretnine. U prilogu akta, pored ostalih dokumenata, dostavljeno je pravomoćno rješenje o eksproprijaciji nekretnina ranije stvarnih vanknjižnih suvlasnika i suposjednika K.M., C.S., E.K., Z.S. i L.E., broj 04-31-1653/2018 od 12.12.2018. godine,

a koje je pravosnažno 18.02.2019. godine. Pravosnažnim rješenjem predlagačima je eksproprisana nekretnina označena kao kč. 1341 zv.“Brdo“, njiva 6 klase u površini od 10281m², upisana u zk. ul/kk.ul. broj 790 KO..., kao vlasništvo V.V. sin H. u dijelu 1/1, a ista je u vanknjižnom suvlasništvu predlagača u dijelovima od po 1/5, u korist sadašnjeg protivnika RMU „Banovići“ d.d. Banovići, u svrhu izvođenja radova radi izrade IV niskopa i vanjskog kruga „JUG-IV“.

U toku postupka pred sudom predlagači su tražila da se utvrdi pravična naknada za predmetnu nekretninu znatno viša u odnosu na ponuđenu naknadu pred nadležnom službom Općine Banovići, gdje je korisnik eksproprijacije ponudio novčani iznos od 66.316,00 KM (zemljište i voćna stabla). Predlagači K.M., C.S., Z.S. i L.E. su tražili da visina naknade po 1 m² iznosi 15,00 KM, dok E.K., je tražio naknadu po 1 m² u iznosu od 25,00 KM.

Prijedlog protivnika predlagača RMU „Banovići“ d.d. Banovići, je nepromijenjen u odnosu na ponudu pred organom uprave Općine Banovići od 66.316,00 KM, od čega za zemljište površine 10281 m² iznosi 61.686,00 KM (6,00 KM po 1 m²), a za voćne zasade novčani iznos od 4.630,00 KM, a da šumska stabla ostanu u vlasništvu predlagača.

Nakon provedenog postupka sud je donio Rješenje, broj: 127 0 V 072841 19 V od 19.03.2020. godine, kojim je utvrđena pravična naknada za eksproprisane nekretnine, na koje rješenje su stranke izjavile žalbu. Rješavajući o žalbama sudionika postupka, Kantonalni sud u Tuzli, Rješenjem broj: 127 0 V 072841 20 Gž od 17.01.2023. godine, usvojio je žalbe predlagača i protivnika predlagača, prvostepeno rješenje ukinuo, i predmet vratio prvostepenom sudu na ponovni postupak. U ponovnom postupku izveden je dokaz po vještaku poljoprivredne struke Cilović Ekremu, budući da vještak Muhić Ramiz iz Živinica, koji je vještačio u ranijem postupku, nije mogao izvršiti dopunu nalaza i mišljenja iz zdravstvenih razloga. Vještak Cilović Ekrem je sačinio osnovni i dopunski nalaz i mišljenje, te je sud po službenoj dužnosti pribavio podatke o nekretninama od Porezne uprave Banovići i Službe za geodetske i imovinsko pravne poslove Banovići.

U ponovnom postupku sud je donio Rješenje, broj: 127 0 V 072841 23 V 2 od 12.10.2023. godine, na koje rješenje su sudionici postupka izjavili žalbu, pa je Kantonalni sud Rješenjem, broj: 127 0 V 072841 23 Gž 2 od 23.01.2024. godine, donio rješenje kojim je usvojio žalbe, prvostepeno rješenje ukinuo i predmet vratio na ponovni postupak pred prvostepeni sud. Nakon ukinutog Rješenja u ponovnom postupku izvršeno je dopunsko vještačenje po vještaku poljoprivredne i šumarske struke, te izvedeni ostali materijalni dokazi, kao u ranijim postupcima.

U toku dokaznog postupka izvršen je uvid i čitanje u “[...]”.

Cijeneći izvedene dokaze sud je donio rješenje kao u dispozitivu iz sljedećih razloga:

Iz nalaza i mišljenja vještaka geometra Nermina Rahmanovića iz Banovića, od 22.11.2019. godine proizlazi da je predmet eksproprijacije parcela broj 1341, upisana u KKU broj 790, sa nazivom „Brdo“, oranica-njiva 6 klase, u površini od 10281 m², upisana na V. (H.) V. KO... . U zemljišnim knjigama predmetna parcela broj 1341 upisana je u zk. ul. br. 790 sa nazivom „Brdo“, njiva 6 oranica-njiva 6 klase, u površini od 10281 m², upisana na V. (H.), V., kao svojina 1/1, a na osnovu rješenja Komisije za izlaganje podataka o nekretninama i utvrđivanje prava na nekretninama Općine Banovići Dn. br. 08/001-007-726/87 od 28.09.1999. godine. U „C“ listu nema tereta. Predmetna parcela po važećim planovima i podacima katastra nekretnina nema pristupni put.

Iz osnovnog i dopunskog nalaza i mišljenja vještaka poljoprivredne struke Ekrema Cilovića iz Tuzle od 07.07.2023. godine, proizlazi da je utvrdio da tržišna vrijednost predmetnih parcela iznosi 13,00 KM/m², što za ukupnu površinu od 10281m² iznosi 133.653,00 KM, a utvrđena na osnovu osam različitih cijena 1m² zemljišta, od cijena dobijenih od Porezne uprave općine Banovići, Službe za imovinsko pravne poslove Općine Banovići i Ugovora zaključenih kod notara. Procjena vrijednosti voćnih stabala po osnovnom nalazu i mišljenju iznosi 6.543,95 KM, a po dopunskom nalazu i mišljenju od 11.05.2024. godine (prema rješenju o eksproprijaciji iznosi 6.042,70 KM), što na ime naknade za zemljište i voćna stabla, prema dopunskom nalazu i mišljenju od 11.05.2024. godine, visina iznosi 139.695,70 KM.

Iz nalaza i mišljenja vještaka šumarske struke Seida Čorbića iz Tuzle od 19.12.2019. godine, proizlazi da je predmetna parcela broj 1341, KO ..., poljoprivredna parcela, koja je sa jednog dijele sjeverne strane, cijele istočne i dijela južne strane, omeđena stablima drveća, najvećim dijelom stablima hrasta. Na jednom dijelu parcele podignuta je borova kultura starosti sadnica od 3-5 godina. Sporadično na ovoj površini ima i starijih sadnica (visine od 1-4 m), kao i tri stabla bijelog bora i jedno stablo hrasta. Procjena vrijednosti drvene mase izvršena je u skladu sa Zakonom o eksproprijaciji („Službene novine F BiH,“ broj 70/207, 36/2010, 25/2012, 8/2015) i Odluka US. 34/2016. Za procjenu i obračun drvnih masa korištene su Tablice taksacionih elemenata visokih i izdanačkih šuma u SR BiH, Drinić P. i dr., Sarajevo 1980., a za izračunavanje vrijednosti korišten je važeći Jedinstveni minimalni cjenovnik proizvoda i usluga u šumarstvu JP Šume TK od januara 2019.godine, po kojem se vrši prodaja drveta u državnim šumama. Vrijednost postojeće ili zatečene drvene mase: hrast-54,06 m³, ostali tvrdi lišćari 1,13m³,bijeli bor 3,26 m³, smrča 0,28 m³, što iznosi 5.410,00 KM. Ukupna vrijednost postojećeg izgubljenog prirasta iznosi 1.830,20 KM i vrijednost šumske kulture 758,30 KM, što ukupno iznosi 7.998,50 KM. Dopunskim nalazom i mišljenjem vještaka od 16.05.2024. godine, sačinjen na osnovu rješenja o eksproprijaciji, utvrđena je vrijednost postojeće drvene mase u iznosu od 8.645,20 KM, vrijednost izgubljenog prirasta u iznosu od 1.200,00 KM i vrijednost šumske kulture u iznosu od 758,30 KM, što ukupno iznosi 10.603,00 KM.

Iz iskaza predlagatelja, saslušanih u svojstvu sudionika postupka proizlazi različita procjena vrijednosti zemljišta po 1 m². Predlagač K.M. je izjavio da realna

cijena zemljišta po 1 m² iznosi oko 15,00 KM s kojom cijenom se usaglasio Z.S., L.E. i C.S., dok je predlagač E.K. izjavio da je optimalna cijena zemljišta po 1 m² u visini od 25,00 KM.

Iz akta Porezne uprave Federacije BiH, Porezna ispostava Banovići, broj: 13-3/9-11-8-1367/19 od 07.10.2019. godine, dostavljenog sudu radi utvrđivanja pravične naknade u ovom postupku, proizlazi da je za traženu kč. br. 1341, zv. „Brdo2, njiva 6 klase, KKU br. 790, KO..., tržišna vrijednost o1 m² iznosi 3,5 KM. Podaci su dobiveni od Federalne geodetske uprave kroz program „CILAP“ na bazi izvještaja za 2018. godinu.

Iz akta Porezne uprave Federacije BiH, Porezna ispostava Banovići, broj: 13-3/9-12-13-5228/23 od 10.05.2023. godine, dostavljenog sudu radi utvrđivanja pravične naknade u ovom postupku, proizlazi da je za traženu kč. br. 1341 zv. njiva 6 klase, K.o. ..., čija prometna vrijednost po najnovijim podacima po 1m² iznosi 3,80 KM. Traženi podaci su uzeti na osnovu procjene prometne vrijednosti zemljišta općine Banovići za K.o. ..., te izvještaja RCN – registra cijena nekretnina od Federalne geodetske uprave iz „CILAP“ programa.

Iz Zapisnika o postignutom sporazumu o naknadi za ekspropisane nekretnine Službe za opću upravu, geodetske imovinsko pravne poslove i katastr br. 04-31-1649/18 od 07.12.2018. godine, utvrđeno je da je zaključen sporazum o naknadi između RMU „Banovići“ d.d. Banovići, kao korisnika eksproprijacije i ranijih sukrisnika S.D. M.D. i M.D.1, za ekspropisanu nekretninu kč. br. 1344, zv. „Diljka“, voćnjak 3 klase u površini od 1468 m², voćna i šumska stabla, te ogradu u iznosu od 10.002,00 KM – prosječna cijena 6,81 po m².

Iz Sporazuma o naknadi za ekspropisanu nekretninu zaključen pred Službom za opću upravu, geodetske, imovinsko pravne poslove i katastar, općine Banovići br. 04-31-1647/2018 od 04.01.2019. godine između RMU „Banovići“ d.d. Banovići kao korisnika ekproprijacije i ranijih suvlasnika Z.B., R.B. F.I. i Š.P., utvrđeno je da je predmet eksproprijacije parcela kč. Br. 1327, zv. „Brdo“ šuma 3 klase u površini od 1414 m², upisana u zk. ul. br. 1296 KO ... i da je utvrđena naknada u iznosu od 11.928,80 KM po 1 m²-prosječna cijena 8,43 KM.

Iz Sporazuma o naknadi za ekspropisanu nekretninu zaključen pred Službom za opću upravu, geodetske, imovinsko pravne poslove i katastar, općine Banovići br. 04-31-1651/2018 od 04.02.2019. godine, između RMU „Banovići“ d.d. Banovići, kao korisnika ekproprijacije i ranijih suvlasnika N.H., A.H., T.A., V.A., F.M., B.G., I.M. i I.K., utvrđeno je da je predmet eksproprijacije parcela kč. broj 1340, zv. „Mekote“ šuma 2 klase u površini od 4456 m², i da je utvrđena naknada u iznosu od 36.115,00 KM, što po 1m² iznosi 8,10 KM.

Iz Sporazuma o naknadi za ekspropisanu nekretninu zaključen pred Službom za opću upravu, geodetske, imovinsko pravne poslove i katastar općine Banovići, broj 04-31-1652/2018 od 06.02.2019. godine, između RMU „Banovići“ d.d. Banovići, kao

korisnika ekproprijacije i ranijih suvlasnika S.B., A.P. i F.R., utvrđeno je da je predmet eksproprijacije parcela kč. br. 1336, zv. „Mekote“ šuma 3 klase u površini od 735 m² sa uračunatom drvnom masom i izgubljenom prirastu, utvrđena je naknada u iznosu od 6.000,00 KM, što po 1m² iznosi 8,16 KM.

Iz Ugovora o kupoprodaji zaključenog kod notara Jusufa Halilovića iz Živinica broj OPU-IP:682/2013 od 20.12.2013. godine, utvrđeno je da je predmet prodaje nekretnina označena kao kč. broj 1614/3 zvana „Liješnica“ njiva 5 klase u površini 400 m², upisana u zk. uložak broj 796 KKO ..., prodavac K.M. i kupac A.S., kupoprodajna cijena 8.500,00 KM, prosječna cijena po 1 m² 21,25 KM.

Nalazu vještaka geometra sudionici postupka nisu prigovarali, a nalazu i mišljenju vještaka šumarske i poljoprivredne struke (osnovni i dopunski nalaz vještaka Ekrema Cilovića) prigovarali su predlagači i protivnici predlagača u smislu visine naknade, pa budući da su isti sačinjeni u skladu sa strukom i odredbama Zakona o eksproprijaciji, sud je prihvatio objektivnim sva tri nalaza i mišljenja vještaka, tj. vještaka geodetske, šumarske i poljoprivrede struke, kako osnovni tako i dopunski, s tim što broj stabala i utvrđenu vrijednost uzima iz dopunskog nalaza i mišljenja vještaka šumarske struke, koja ukupno iznosi 10.603,00 KM. Nalaz poljoprivredne struke osnovni i dopunski, koji se odnosi na voćna stabla, sud prihvata u potpunosti, pa stoga cijena zemljišta po 1 m² iznosi 13,00 KM, a vrijednost voćnih stabla u iznosu od 6.042,70 KM, što ukupno na ime vrijednosti zemljišta od 133.653,00 KM i vrijednosti voćnih stabala u iznosu od 6.042,70 KM, iznosi 139.695,70 KM. Nalaz i mišljenje vještaka poljoprivredne struke Ramiza Muhića, sačinjen u ranijem postupku, sud nije prihvatio objektivnim, jer je nepotpun zbog čega je određeno vještačenje po vještaku poljoprivredne struke Ekremu Ciloviću, koji je sačinio osnovni i dva dopunska nalaza i mišljenja. Sud je prihvatio osnovni nalaz i mišljenje vještaka poljoprivredne struke u dijelu obračuna cijene zemljišta po 1 m² u iznosu od 13,00 KM, a obračun naknade za voćna stabla u iznosu od 6.042,70 KM, iz dopunskog nalaza i mišljenja od 11.05.2024. godine, dok je dopunski nalaz i mišljenje od 28.07.2023. godine (procjena 1 m² zemljišta u odnosu na korist koja bi se mogla postići gajenjem određenih kultura) sud nije prihvatio, budući da je prihvatio osnovni nalaz i mišljenje u vezi cijene zemljišta po 1 m².

Iz provedenih dokaza utvrđeno je da je postignuta cijena zemljišta pred Organom uprave Općine Banovića za ekspropisane nekretnine u neposrednoj blizini lokacije predlagatelja u rasponu od 6,81-8,43 KM po 1 m², gdje je uključena vrijednost voćnih stabala i ograde. Dakle, nije izvršena pojedinačna procjena, nego ukupna cijena zemljišta sa pripadajućim stvarima. Iz dostavljenih podataka Porezne uprave Banovići, utvrđeno je da je tržišna vrijednost zemljišta po 1 m² za traženu parcelu iste K.o. u iznosu od 3,50 KM, a iz kupoprodajnog ugovora zaključenog od strane notara, postignuta cijena zemljišta po 1 m², u istoj K.o. je 21,25 KM. Iz pribavljenih sporazuma o naknadi za ekspropisane nekretnine od nadležne općinske službe Banovići i podataka Porezne uprave o cijeni nekretnina, u ponovnom postupku je utvrđeno da je nadležna služba dostavila sporazume o naknadi za parcele koje se po kulturi vode kao šuma, što ne odgovara predmetnoj parceli iz ovog postupka, jer se po kulturi vodi kao njiva. Prosječna cijena zemljišta po 1m² na parceli kč. br. 1340, zvana Mekote, šuma 2

klase, iznosi 8,10 KM, a na parceli kč. br. 1336, zvana Mekote, šuma 3 klase, iznosi 8,16 KM. Cijena zemljišta po 1m² za K.o. ... prema podacima Porezne uprave Banovići od 10.05.2023. godine, iznosi 3,80 KM.

Odredba člana 64. stav 2. Zakona o eksproprijaciji FBiH, propisuje da kod utvrđivanja naknade za ekpropisane nekretnine sud je dužan uzeti u obzir visinu naknade utvrđenu prilikom sporazumnog utvrđivanja naknade pred općinskom službom za upravu, ako je većina stranaka zaključila takav sporazum na određenom području u postupku eksproprijacije za izgradnju istog ili drugog objekta. Slijedom navedene odredbe, koja uslovno obavezuje sud da uzme u obzir visinu naknade utvrđene prilikom sporazumnog utvrđivanja naknade pred općinskom službom za upravu, ako je većina stranaka zaključila takav sporazum, sud nije mogao donijeti odluku na osnovu zaključenih sporazuma pred općinskom službom za upravu, bez obzira što je pribavio četiri sporazuma, jer iz tih sporazuma ne može se utvrditi cijena zemljišta po 1m², budući da je utvrđen zbirni iznos u koji je uključena naknada za voćna i šumska stabla ili je u pitanju šumsko zemljište, a u ovom postupku se utvrđuje naknada za zemljište koje je po kulturi njiva. Iz navedenih razloga, sud nije prihvatio cijenu zemljišta iz Sporazuma o naknadi zaključenim pred općinskom službom, niti cijenu postignutu u pojedinačnim ugovorima, kao npr. cijenu od 21,50 KM po 1m², iz kupoprodajnog ugovora notarski obrađenog kod notara Jusufa Halilovića iz Živinica, niti cijenu dostavljenu od Porezne uprave Banovići, niti je sud zbrajao pojedinačne cijene i utvrđivao aritmetički prosjek, nego je prihvatio nalaz i mišljenje vještaka Ekrema Cilovića u dijelu osnovnog nalaza i mišljenja kod obračuna naknade vrijednosti zemljišta po 1 m², u iznosu od 13,00 KM, što iznosi 133.653,00 KM i obračun naknade za voćna stabla iz dopunskog nalaza i mišljenja, od 11.05.2024. godine, u iznosu od 6.042,70 KM, kao i obračun naknade za šumska stabla po dopunskom nalazu vještaka šumarske struke, u iznosu od 10.603,00 KM. Ovakav obračun naknade za ekpropisane nekretnine je najrealniji u situaciji kad postoje velike razlike u cijeni 1m² kada je u pitanju promet nekretnina u ovoj K.o., od 3,50 KM, dostavljen od Porezne uprave Banovići do postignute cijene iz kupoprodajnog ugovora obrađenog kod notara u iznosu od 21,50 KM. Da sporazumi o zaključenim naknadama ne odražavaju realno stanje, odnosno da većina stranaka ne rješava naknadu za ekpropisane nekretnine zaključivanjem sporazuma, govori činjenica da Porezna uprava Banovići dostavlja sporazume o postignutoj naknadi, koji su stari preko četiri godine, što je razlog više ne prihvatanje postignute cijene po 1m² iz tih sporazuma, a da utvrđena cijena 1m² po 13,00 KM, iz osnovnog nalaza i mišljenja vještaka Ekrema Cilovića, predstavlja pravičnu naknadu za ekpropisane nekretnine. Vještak je u svom nalazu i mišljenju da je predmetna parcela udaljena od grada Banovići oko 2000 metara, odnosno 2 kilometra, da pripada naseljenom mjestu od koje parcele je prvi porodični stambeni objekat udaljen oko 100 metara, na parceli k.č. broj 1361, vlasništvo R. (H.) B. Nadalje, vještak je prilikom izrade nalaza i mišljenja uzeo u obzir sporazume zaključene pred organom uprave i podatke iz Porezne uprave, pojedinačne ugovore, dosadašnja iskustva i procjenu tržišne vrijednosti za ovu k.o., te utvrdio cijenu po 1 m², u iznosu od 13,00 KM, što za ukupnu ekspropisanu nekretninu iznosi 133.653,00 KM.

Sud nije prihvatio prijedlog predlagača da se utvrđena cijena za eksproprijaciju poveća na ime ličnih i porodičnih prilika, jer predlagači, shodno odredbi čl. 47. Zakona o eksproprijaciji F BiH, nisu dokazivali da su prinosi sa predmetne parcele od bitne važnosti za materijalnu egzistenciju, nego su to samo uopšteno isticali tokom postupka.

Odluku o zakonskoj zateznoj kamati sud je donio primjenom odredbe člana 63. Zakona o eksproprijaciji koja propisuje da se visina naknade za eksproprijisanu nekretninu određuje u sudskom postupku prema okolnostima koje su postojale u vrijeme donošenja prvostepenog sudskog rješenja o naknadi. Budući da su nalazi vještaka poljoprivredne i šumarske struke urađeni u ovom postupku, sud je odredio naknadu u skladu sa nalazom i mišljenjem vještaka, te stoga odredio i zakonsku zateznu kamatu od donošenja prvostepenog rješenja, odnosno protekom 15 dana od dostavljanja prvostepenog rješenja o eksproprijaciji.

Odluku o troškovima postupka sud je donio na osnovu člana 66. stav 2. Zakona o eksproprijaciji, te obavezao protivnika predlagača da naknadi troškove postupka predlagateljima u iznosu od 10.022,40 KM. Troškovi predlagača sastoje se od nagrade advokatu za pristup na ročištima od 14.11.2019., 28.01.2020. i 27.02.2020. godine, u iznosima od po 940,00 KM, za pristup advokata na ročište od 26.04.2023., 25.05.2023., 06.09.2023. godine u iznosima od po 1.132,20 KM, za pristup advokata na ročište od 23.04.2024. i 22.05.2024. godine, u iznosima od po 1.335,00 KM, sastav žalbe od 27.04.2020. godine, u iznosu od 940,00 KM i sastav žalbe od 06.11.2023. godine, u iznosu od 1.310,00 KM, što ukupno iznosi 11.136,00 KM, umanjeno za 50% po članu 16. stav 4. i 5. Tarife o nagradama i naknadi troškova za rad advokata („Službene novine F BiH“, 22/2004) što iznosi 5.568,00 KM, sve uvećano za 80%, što iznosi 4.454,40 KM, pa budući da je advokat zastupao pet predlagača, dosuđuju mu se troškovi u ukupnom iznosu od 10.022,40 KM.

Sud je odbio predlagače sa zahtjevom za naknadu troškova u punom iznosu, bez umanjenja od 50 %, jer traženi pojedinačni iznosi prelaze prosjek mjesečne plate, što je protivno važećoj Tarife o nagradama i naknadi troškova za rad advokata.

Sudija

Sead Konjević

POUKA O PRAVNOM LIJEKU: Protiv ovog rješenja može se izjaviti žalba Kantonalnom sudu Tuzla putem ovog suda u roku od 15 dana od dana prijema prijepisa rješenja.